

# 2012-ի

## խորհրդարանական ընտրություններին ընդառաջ...

**Հարցազրույց քաղաքական վերլուծաբան, ՌԱԳԴՎ փորձագետ Էդգար Վարդանյանի հետ**

-Պարոն Վարդանյան, 2012-ն ընտրական տարի է՝ առաջինը 2008-ի ընտրությունների դաժան փորձից հետո: Ըստ Ձեզ, այս տարիներն ու նախորդ ընտրությունների փորձը ի՞նչ են տվել հասարակությանն ու իշխանություններին կամ ի՞նչ են փոխել նրանց մեջ:

-Նախ՝ պետք է նշել, որ հասարակությունը, կարծես, շատ ավելի խստապահանջ է դարձել քաղաքական դաշտում գործող բոլոր սուբյեկտների հանդեպ: Երևում է նաև, որ խորանուն է վերջիններիս նկատմամբ ընդհանուր անվստահությունը:

2008-ին մարդիկ ևս մեկ անգամ առիթ ունեցան համոզվելու, որ ներկա վարչակարգի պայմաններում ընտրական գործընթացները վերածվում են իշխանությունն ամեն զնով պահելու միջոցառման: Հասարակությունը այս տարիների ընթացքում տեսավ, որ իշխանությունները, թեև պատրաստ են հասարակությանը որոշակի զիջումներ անելու, բայց ցանկություն չունեն իրականացնել վարչակարգի փոփոխությանը նպաստող որևէ գործողություն:

Իշխանությունները, իհարկե, հասկացել են, որ 2008-ի մթնոլորտի առկայության դեպքում հնարավոր չի լինի խուսափել քաղաքական ճգնաժամից, և որ այդ դեպքում իրենց համար չափազանց դժվար է լինելու մնալ երկրի ղեկին: Սակայն այսօր նրանք կատարում են միայն որոշակի կոսմետիկ բարեփոխումներ, որոնք ընդամենը կարող են ժամանակավորապես քողարկել քաղաքական համակարգի արատները, ոչ ավելին:

Հասարակությունն էլ, իմ կարծիքով, այժմ փնտրտուքի մեջ է: Նրան, կարծես թե, այդքան էլ չեն ոգևորում գոյություն ունեցող ընդդիմադիր քաղաքական ձևաչափերը, բայց նա դեռևս չգիտի, թե ինչով փոխարինել դրանք: Ճիշտ է, այսօր ակտիվ քաղաքացիների որոշակի շերտեր ներգրավվում են տարբեր տեսակի քաղաքացիական նախաձեռնություններում, սոցիալական ցանցերում ընթանում են հասարակական, քաղաքական խնդիրների վերաբերյալ թե՛ բանավեճեր, սակայն արդեն



### Հասարակությունն այսօր փնտրտուքի մեջ է... Նրան այլևս չեն ոգևորում գոյություն ունեցող ընդդիմադիր քաղաքական ձևաչափերը

հավերժ դարձած հարցերից մեկի՝ ինչպես փոխել համակարգը, պատասխանը դեռևս չի գտնվել:

- Արդյո՞ք այսօր իշխանությունները պատրաստ են կամ կզման արդար ընտրությունների:

- Կարող եմ ասել, որ համենայն դեպս այսօր ես չեմ տեսնում իշխանությունների՝ արդար ընտրություններ անցկացնելու կամքի նախադրյալներ: Ազատ և արդար ընտրություններ անցկացնելու պատրաստակամության վերաբերյալ իշխանությունների հայտարարությունները պետք է արտահայտվեն կոնկրետ գործերով, իսկ այդպիսիք բացակայում են: Տեսեք, 2008-ի ընտրություններից հետո հասարակությունը կասկածի տակ դրեց ընտրությունների արդյունքները և դուրս եկավ փողոց: Չմոռանանք, որ այդ ընտրությունների արդյունքները չընդունվեցին նույնիսկ ներկայում իշ-



# Ազատ եւ արդար ընտրություններ անցկացնելու պատրաստակամության վերաբերյալ իշխանությունների հայտարարությունները պետք է արտահայտվեն կոնկրետ գործերով

խանական կոալիցիայի մաս կազմող «Օրինաց երկրի» կողմից՝ նրա ստորագրությունը բացակայում է ընտրությունների արդյունքներն ամփոփող արձանագրության տակ: Այն, որ ընտրություններն արդար չէին, վերջերս խոստովանեց այդ ընտրությունների ժամանակ արտագործախարար աշխատած Վարդան Օսկանյանը: Եվ նման գնահատականի արժանացած ընտրություններից հետո արտահերթ ընտրություններ չեն նշանակվել, ընտրակեղծարարները չեն պատժվել, իսկ ընտրությունների հետևանքով տեղի ունեցած մարտի 1-ի զոհերի մեղավորներն էլ չեն բացահայտվել: Եթե մեկը նախկինում գործած իր մեղքը չի ընդունել և դրա հետևանքները չի վերացրել, ապա ոչ մի հիմնավորում չկա հավատալ նրա խոսքերին:

Ընտրությունների մասին խոսելիս՝ ցանկանում են ուշադրություն դարձնել ևս մի հանգամանքի վրա: Շատ հաճախ, երբ ասում են ընտրություններ, նկատի են ունենում հիմնականում քվեարկության գործընթացը: Սակայն քվեարկությունն ընդամենը ընտրությունների մի մասն է: Հարավոր է, որ այս անգամ քվեարկությունն անցնի համեմատաբար մաքուր, քան նախկինում էր: Բայց, օրինակ, հենց այսօր մենք տեսնում ենք, որ ընտրությունների նախաշեմին հեռուստաընկերությունները զբաղված են իշխանությունների գովաբանությամբ և համարժեք կերպով չեն անդրադառնում հասարակության հիմնախնդիրներին: Կա կողմնակալ մոտեցում իշխանություններին սուր քննադատող քաղաքական ուժերի, հասարակական կազմակերպությունների և այլոց նկատմամբ: Սա նշանակում է, որ հասարակությանը չեն ցանկանում հնարավորություն տալ օբյեկտիվ պատկեր ունենալ իրականության վերաբերյալ, փաստացի, ընտրությունների նախաշեմին արդեն անհավասար պայմաններ են ստեղծված: Իշխանությունները՝ շնորհիվ նախագահականից վերահսկվող հեռուստաընկերությունների վերոնշյալ քաղաքականության, մեծ առավելություններ են մտնում ընտրապայքարի մեջ: Իսկ դա նշանակում է, որ արդար ընտրությունների սկզբունքներից մեկն արդեն իսկ ոտնահարված է:

**- Իսկ քաղաքացին պատրաստ է պայքարելու իր ծայնի համար:**

- Քաղաքացիական առումով ակտիվ քաղաքացիների մտավորական զանգվածը՝ այո, պատրաստ է: Հասարակության մնացած հատվածների՝ պայքարելու պատրաստակամության մասին դժվարանում են ինչ-որ բան ասել: Սակայն, կրկնում են, որ ամեն դեպքում դեռևս չեն գտնվել պայքարելու արդյունավետ և հաջողության բերող մոդելներ:

**- Իբրև քաղաքական վերլուծաբան ինչպիսի՞ն է Ձեր դիրքորոշումը լիակատար համամասնական ընտրակարգի անցնելու վերաբերյալ:**

- Նախ՝ պետք է նշել, որ յուրաքանչյուր ընտրակարգ ունի իր թերություններն ու առավելությունները: Լիակա-

տար համամասնական ընտրակարգը լայնորեն կիրառվում է հիմնականում զարգացած եվրոպական երկրներում: Այդ ընտրակարգը պահանջում է կայացած կուսակցական համակարգի առկայություն: Իսկ մենք գիտենք, որ Հայաստանում չկա նորմալ կուսակցական համակարգ:

Մյուս կողմից՝ Հայաստանի ներկայիս ընտրական համակարգը մեծապես ձեռնտու է իշխանություններին և նպաստում է ստատուս քվոյի պահպանմանը: Եթե անցում կատարվեր լիակատար համամասնական ընտրակարգին, դա հնարավորություն կտար ընդդիմադիր ուժերին որոշակիորեն խոչընդոտել իշխանությունների PR ծրագրի իրականացմանը: Բանն այն է, որ վերջիններս ցանկանում են «մաքուր» պահել համամասնական ցուցակը օլիգարխներից՝ «ուղարկելով» նրանց մեծամասնական ընտրատարածքներ: Մեծամասնականով առաջադրվող պատգամավորի թեկնածուն կրկնակի ուժ է ներդնում Աժ ընտրությունների ժամանակ: Վերջինիս սատարող թիմը շահագործում է նրա անձնական ամբիցիաները՝ սեփական տարածքում «ընտրյալ» լինելու հնարավորություն տալու դիմաց նա պարտավորվում է ձայներ ապահովել համամասնական ընտրակարգով առաջադրվող իրեն պաշտպանող քաղաքական թիմի օգտին:

Ամեն դեպքում, միանշանակ է հետևյալը՝ ընտրակարգի փոփոխությունն ինքնին չի կարող ազատ և արդար ընտրություններ երաշխավորել:

**- Եթե փորձենք մոտավոր կանխատեսում անել, ապա ինչ համամասնությամբ կբաշխվեն պորտֆելներն Աժ-ում իշխանությունների և ընդդիմության միջև:**

- Եթե հասարակությունը կարողանա իրական դեմոկրատական շարժում նախաձեռնել և քաղաքական դաշտում թելադրող դառնալ, եթե հասարակությունը կարողանա այնպես ինքնակազմակերպվել, որ հենց սկզբից, մինչև քվեարկությունը, նրան հաջողվի չեզոքացնել կեղծիքի մեխանիզմը, ապա ընդդիմադիր ուժերը, միասին վերցրած, բացարձակ մեծամասնություն կարող են ստանալ: Իսկ եթե հասարակությունը չկարողանա դա անել, ապա արդեն իշխանություններն են որոշելու, թե ով ինչքան ձայն կստանա: Այդ դեպքում ամենահավանականն այն է, որ իշխանություններն իրենց կթողնեն սահմանադրական մեծամասնության համար անհրաժեշտ նվազագույնը, իսկ մնացածը շոայլորեն «կշնորհեն» ընդդիմադիրներին՝ դրանով փորձելով «եվրոպական տեսք» տալ ընտրությունների արդյունքներին:

**Թեհմինա Արզումանյան**

